

蜀

水

經

蜀水經卷之十

京山李 元太初

若水

若水謂之金沙江源出青海之良錯有二源左源爲雜母都必拉右源爲托母楚必拉合流而南爲鴉礮江

亦名夾龍江亦名雅龍江亦名黑惠江亦名納夷江  
史記曰黃帝子昌意降居若水漢書曰繩水出蜀郡旄牛徼外東南至故關爲若水南逕越嶲邛都縣西直南至會無縣淹水東南流注之又東北至犍爲朱

提縣西爲瀘江水又北至夔道縣入於江酈注曰山海經南海海內黑水之間有木名曰若木若水出焉灰野之山有樹焉青葉赤華厥名若木生崑崙山西附西極也淮南子若木在建木西木有十華其光下照地故屈原離騷天問羲和未陽若木何光是也然若木之生非一所也黑水之間厥木所植水出其下故水受稱焉若水沿流間關蜀土黃帝子昌意德劣不足紹承天位降居斯水爲諸侯焉娶蜀山氏生顓頊于若水之野有聖德二十登帝位承少皞金官之

之法尤精房中術雖淫瀆倫不禁能運氣葆神身死  
心生復投胎生世爲刺麻履錦靴衣襪襪半臂腰繫  
帛不着視衣衣冠尙紅黃色醫藥咸自詔產與中國  
異卜筮則撫經目推測其經有吉凶辭字從右向左  
橫書之蠻人信其術生子以其一承祀餘皆薙髮爲  
僧娶一婦弟兄羣妻之其飾耳珥大環衣大領衫腰  
纏白帶頭戴白拖翅巾足著白皮履項掛念珠纍纍  
有多至四五串者女人辨髮下垂衣偏衫細褶裙首  
簪珠鏤常備身爲商人沙鴉以養其夫見刺麻則唇

點硃以爲媚父母死投之水火或付鷹犬不恤也四  
時氣多溫和隆冬如秋霜雪不厚積或薄冰於河日  
出則消多陰少霽歷夏秋冬三季不見北斗無君長  
以活佛爲長命其徒闡黃教者爲胡圖克圖其次掌  
黃教者爲堪布又其次轄地方民人者爲磔巴民聽  
約束唯謹所居謂之詔無城郭以居民礪房環之街  
市固井井也街外白水江澄清見底產綠松石似玉  
綠色亦引江水爲圩植稻其中故藏多白米樓閣橋  
梁營造爲巧居然勝地也詔外則崇山環繞隘口崎

嶺矣南北寬長四千里東西延廣四五百里

燕有唐公主及贊普及白布國女王塑像按唐史貞觀十五年太宗以宗女爲文成公主妻其贊普棄宗弄讚永隆元年公主薨景龍三年中宗以雍王守禮女爲金城公主妻其贊普棄隸踏開元二十九年公主薨則吐蕃兩尙公主也永徽初棄宗弄讚卒孫乞黎拔布立儀鳳四年子器孛悉弄立長安三年子棄隸縮立則棄隸踏乃棄宗弄讚之元孫也

西藏大詔門外有唐文武孝德皇帝和盟碑高一丈

五尺寬四尺厚二尺旁刊唐大臣姓名有牛僧孺字  
樣按史唐與吐蕃盟者屢矣開元二年蕃相岔達延  
上書乞盟定境于河源丐左散騎常侍解琬泄盟帝  
令姚崇報書未定而全達延寇臨洮盟遂寢十五年  
吐蕃乞盟唐使報聘聽以赤嶺爲界豎大碑刻約其  
上二十六年吐蕃大入河西劍南節度王昱碎其碑  
至德四年吐蕃乞和帝令宰相蕭華裴遵度與之盟  
大歷十四年節度張鎰復與盟于清水建中元年使  
韋倫報聘倫請上自爲載書楊炎以爲非敵請與郭

子儀令上畫可貞元三年檢校司空渾瑊盟於平涼而吐蕃伏兵壇西作亂不果長慶元年使者尙精力陀思來朝乞盟穆宗命大理卿劉元鼎充盟會使副以右司郎中劉師老右僕射韓皋御史中丞牛僧孺吏部尙書李絳兵部尙書蕭俛戶部尙書楊於陵禮部尙書韋綬卿太常趙宗儒司農裴武京兆尹栢公綽金吾將軍郭璠與蕃使論訥羅咸書名於策同盟京師之西郊然而蕃騎潛屯魯州矣二年蕃使趙國章致信幣帝命元鼎就盟其國告盟一人自肩譯授



於下重以浮屠爲誓蓋卽此碑也文武孝德皇帝則  
穆宗長慶元年七月羣臣所上尊號元鼎所經歷踰  
成紀武川抵河廣武梁皆隴右故地過石堡城巖壁  
峭立磴道回屈號鐵刀城右行數十里土石皆赤所  
謂赤嶺距長安三千里渡關恒盧州直邈娑川之南  
百里藏河所流河西南地如砥原野秀沃夾河多棗  
柳贊普居藏河北卽今藏河也

西藏大詔西廊有唐三藏師徒四衆像塑元裝孫行  
者猪八戒沙和尚之屬又謂藏東七十里地名德慶

里者卽高老莊爲猪八戒招親處然續高僧傳云元  
裝誓往華胥詣陳表有司不爲通引貞觀三年時遭  
霜儉下勅道俗隨豐四出幸因斯際徑往西域法苑  
珠林假重其事乃言詔金吾將軍元策扈三藏往西  
域本無四衆之怪誕也元道士邱長春演西遊記贈  
多俗口漢人賈於藏中者傳述繪塑不足辨矣惟是  
釋迦佛生於天竺國山海經謂之天毒汲冢書謂之  
天竹班史謂之捐毒范史謂之身毒杜毒傳謂之天  
督亦云天筑徐廣史注或作齡毒訖毒索隱謂身音

乾亦云乾竺西域記云或曰賢豆亦云印度唐書云  
或曰糜伽陀或曰婆羅門元始謂之忻都漢郎中蔡  
愔秦景魏朱仕行晉僧法顯智猛支法領唐僧元裝  
宋僧繼業道圓行勤法遇嘗至其地法顯佛國記曰  
由長安度隴經乾歸國赧檀國過養樓山至張掖鎮  
進燉煌塞渡沙河行十七日至鄯善國又西北行十  
五日至烏夷國又西南行一月五日至于闐國又四  
十五日至向子合國又南行四日登蔥嶺爲于鹿國  
又二十五日至竭父國又西行一月過蔥嶺至北天

竺界嶺嶺西南行十五日渡新頭河至烏菴園是正  
北天竺也新頭河至南天竺迄于南河四五萬里皆  
平坦無大山川自烏菴東行五日至健陀衛國是阿  
育王子法益所治處又南行四日至弗樓沙國六月  
氏破滅處又西行十六由延至醯羅城又北行一日  
至那竭國又南行十日至跋那國又東行三日復渡  
新頭河至毗荼國又東南行八十由延至摩羅頭又  
國渡而邪河又東南行十八由延至佉迦施國又北  
至千由延至火境寺又東南行七由延至屬饒城度

恒水南行三由延至呵梨林又東南行十由延至沙  
祇國又南行八由延至拘薩羅國舍是波斯匿王所  
治又東南行十二由延至那毗伽國是拘樓秦佛生  
處又北行一由延至拘那舍國是牟泥佛生處又東  
行一由延至迦維羅衛城是白淨王故宮又東行五  
由延至藍莫國又東行三由延至太子遣車匿白馬  
還處又東行四由延至炭塔又東行十二由延至拘  
夷那竭城又東南十二由延至諸犁車又東行五由  
延至毗舍離國有阿難半身塔又東行四由延至五

河合口度河南行一由延至摩竭提國巴連弗邑是  
阿育王所治又東南九由延至小孤石山又西南一  
由延至那羅聚落是舍利佛生處又西行一由延至  
王舍新城是阿闍世王所造又東南十五里至耆闍  
崛又順恒水西下十由延至曠野又西行十二由延  
至迦尸國又西北十二由延至拘延彌國又南行二  
百由延至達嚨國道遠不可行乃從波羅捺國東還  
順恒水東行十八由延至瞻波國又東行五十由延  
至摩迦帝國卽是海口隨商舶汎十四日至師子國

又十三日至一島又九日至耶婆提國又五十日  
廣州過黑風暴雨經七十餘日又晝夜十二日  
至青州長嶺郡唐西域記曰僧元奘以貞觀三年奉  
勅道俗隨豐四出由姑臧熾煌出高昌故地經阿耨  
泥國卽烏耆也西南行二百餘里踰一小山越二大  
河得平川行七百餘里至屈支國卽龜茲也西行六  
百餘里經小沙磧至跋祿迦國卽姑墨也西北行三  
百餘里度石磧至凌山爲蔥嶺北源水多東流山行  
四百餘里至大清池謂之熱海西北行五百餘里至

素葉水城西行四百餘里至千泉西行百五十里至  
咀邏私城西南行二百餘里至白水城西南行二百  
餘里至恭御城南行四五十里至茹赤建國西行二  
百餘里至赭時國卽石國也西行千餘里至窰塔利  
瑟那國東臨葉河西北行大砂碛五百餘里至迦抹  
建國卽康者國也東南至弭秣賀國卽米國也北至  
刼布咀囉國卽曹國也西行三百餘里至屈霜你迦  
國卽何國也西行二百餘里至喝捍國卽東安國也  
西行四百餘里至捕喝國卽中安國也西行四百餘



里至伐地國西南五百餘里至貨利習彌伽國西南  
行三百餘里至羯霜那國卽史國也西南行二百餘  
里入山東南行三百餘里入鐵門自高昌至此凡經  
十六國矣一道南出至覩貨邏國卽吐火羅國也凡  
度十二國地西至縛喝國北臨縛芻河卽博父河爲  
小王舍城西南入雪山阿至銳稱陀國西南至胡賓  
建國西北至咀刺健國西接波刺斯國界從縛喝國  
南行百餘里至揭職國東南入大雪山行六百餘里  
出覩貨邏國境至梵衍那國東行入雪山踰越黑嶺

至迦畢試國東行六百餘里越黑嶺至濫波國是印度國之北境矣東南行百餘里踰大嶺濟大河至那揭羅昌國卽佛布髮掩泥故地醯羅城有佛頂骨大錫杖東南山谷中行五百餘里至健馱邏國卽乾陀衛國也有世親如意造論處仙女亂佛化鬼母處其東南八九里卑鉢羅樹南有迦膩色迦王窣堵坡東北行五十餘里渡大河至布色羯羅伐底城北行五十餘里至商莫迦菩薩被害處東南行二百餘里至跋膚沙城東北五十餘里至崇山東南行百五十里

至烏鐸迦漢茶城北踰山涉川行六百餘里至烏仗  
那國卽烏耒國也昔輪王苑圍其東北二百五六十  
里大山有龍泉名阿波邏羅卽信度河之源也烏仗  
那國住耆揭釐城南二百餘里大山側至摩訶伐那  
大林伽藍西北下山三四十里摩愉伽藍西六七十  
里至無憂王宰堵波西北二百餘里入珊泥羅闍川  
至薩衰殺地東北踰山谷逆上信度河行千餘里至  
達麗羅川東行五百餘里至鉢露羅國復還烏鐸迦  
漢茶南渡信度河至咀叉始羅國東南行七百餘里

至信訶補羅國西臨信度河復還咀叉始羅國之北  
界渡信度河南行二百餘里度大石門東行五十餘  
里至孤山東南山行五百餘里至烏刺尸國東南登  
山度鐵橋行千餘里至迦濕彌羅國卽剌賓國也西  
南踰山行七百餘里至半笈蹉國東南行四百餘里  
至曷羅闍補羅國東南下山渡水行七百餘里至磔  
迦國東行五百餘里至那僕底國東南行五百餘里  
至塔秣蘓伐那僧伽藍卽閻林也東北行百四五十  
里至闍爛達羅國東南山谷行七百餘里至屈露多

國北行千八九百里至洛護羅國北二千餘里至秣  
羅娑國又自屈露多南行七百餘里越大山濟大河  
至設多圍盧國西南行八百餘里入中印度境至波  
理夜咀羅國東行五百餘里至秣菟羅國有烏波毳  
多石室獼猴墮坑處四佛經行處城臨闌牟那河國  
境東臨琬伽河闌牟羅河東流八百里至琬伽河也  
東北行五百餘里至薩他泥濕伐羅國東北行四百  
餘里至宰祿勤那國渡河東岸至秣底舖羅國其北  
三百餘里是北印度之婆羅吸摩補羅國北界東女

國也東南行四百餘里至瞿毗霜那國東南行四百餘里至聖醯掣咀邏國南行二百六七十里渡菟伽河西南至毗羅剎拏國東南行二百餘里至劫比他國卽僧伽舍國也有佛爲母切利安居處賢劫四佛經行石基西北行滅二百里至羯若鞠闍國卽曲女城也臨菟伽河卽恒河有圓佛行坐處七日說法處東南行六百餘里渡菟伽河南至阿踰陀國東行三百餘里渡菟伽河北至阿耶穆佉國東南行七百餘里渡菟伽河南闍牟那河北至钵邏那伽國西南行

五百餘里至憍賞彌國卽拘睢彌國也東北行五百餘里至室羅伐悉底國卽舍衛國城南五里有祇陀園有佛洗病除饑處目連舉身子衣處誦殺姪女處戰遮女人沒處東南行五百餘里至劫比羅伐窣堵國卽迦毗羅衛國也是淨飯國釋迦如來生處東行二百餘里至藍摩國東北行至拘尸那揭羅國西北四里河西岸是如來涅槃處復行五百餘里至婆羅痾斯國卽波羅奈國城隣疏伽河有鹿野寺是如來初轉法處鹿王迎佛處又順疏伽河流東行三百餘

里至戰主國東北渡兢伽河行四百五十里至吠舍  
釐國卽毘舍離也有說淨名處身子證果處姨母滅  
度處七百結集處阿難分身處寶積淨名諸故宅其  
東北五百餘里是北印度弗栗特國尼波羅國北界  
東女國與吐蕃接壤南渡兢伽河至摩揭陀國卽摩  
羯提國也西南四百餘里度泥連禪河爲伽耶城菩  
提寺東望雞足山東六十里有香茅城自此東旋東  
行二百餘里至伊爛拏鉢伐多國有佛坐迹立迹瓶  
迹又順河南岸東行三百餘里至瞻波國東行四百



餘里至羯朱盟祇羅國東渡宛伽河行西五百餘里  
是西印度之蕙刺佗國也北行千八百餘里至瞿折  
羅國東南行二千八百餘里至鄔闍衍羅國東北行  
千餘里至擲枳陀國北行九百餘里入中印度境至  
摩醯溫伐羅補羅國北行千九百餘里入西印度境  
渡信度河至信度國西南行千五百里至阿點婆  
翅羅國北行七百餘里至臂多特國東北行三百餘  
里至阿耨茶國東北九百餘里至伐刺拏國西北踰  
大山涉廣川行二千餘里至漕矩咤國出印度境入

突厥之地矣北行五百餘里至弗栗特薩儻那國東  
北踰山涉川越迦畢試國至大雪山婆羅犀那大嶺  
三日下午至安咀羅縛國西北入谷踰嶺四百餘里至  
潤悉多國卽覩貨邏國故地也西踰山谷行三百里  
至活國東入蔥嶺東行百餘里至耆健國東踰山谷  
行三百餘里至訖栗瑟摩國東行三百餘里至呬摩  
怛羅國東行二百餘里至鉢鐸創那國東南行二百  
餘里至淫薄健國東南行三百餘里至屈浪拏國東  
北行五百餘里至達摩悉鐵帝國臨縛芻河又東山

行近千里至商彌國東行七百餘里至波謎羅川中  
大龍池二派西派與縛芻合流六百餘里至奔那伐  
彈那國東行九百餘里入東印度境渡大河至迦摩  
縷波國南行千二三百里至三摩咀吒國東北濱大  
海若自東北行凡有六國卽達林邑因道阻長多瘴  
癘乃從西行九百餘里至耽摩栗底國西北行七百  
餘里至羯羅拏蕪伐刺那國西南行七百餘里至烏  
荼國東南臨大海西南二千餘里至恭御陀國西南  
行千五百里入南印度境至羯伽伽國西北行千八

百餘里入中印度境至橋薩羅國南行九百餘里入南印度境至案達羅國南行千餘里至馱那羯磔迦國西南行千餘里至珠利耶國南行千五六百里至達羅毗荼國南行三千餘里至秣羅矩咤國卽枳秣羅國也有觀自在菩薩天宮自此東南入海三千餘里有僧伽羅國卽古獅子國非結大伴不可至故不行也乃北行二千餘里至恭建那補羅國西北行二千四五百里至摩訶刺佗國西行千餘里渡耐秣陀河至跋祿羯粘婆國西北行二千餘里至摩臘婆國

卽南羅國也西北行三百餘里至契佗國北行千餘里至伐臘毗國卽北羅羅國也此去北七百餘里是西應度之阿難陀補羅國河合而西流東派與徙多河合而東流川南有鉢露羅國東南行五百餘里至羯盤陀國北背徙多河卽經所謂悉陀河也東入鹽澤潛於地中涌於積石爲東夏河矣東北踰嶺行二百餘里至奔穰合羅東出蔥嶺行三百餘里至烏鐵國北行山磧五百餘里至佉沙國卽疏勒也東南行五百餘里渡徙多河踰大沙嶺至斫句迦國卽沮渠

也東行八百餘里至瞿薩旦那國卽于闐也東三百餘里大荒澤東行三十餘里至迦摩城東入沙磧行二百餘里至泥壤城東行入大流沙四百餘里至覩貨邏故國東行六百餘里至折摩馱羅故國卽涅末地也東北行千里卽納縛波故國卽樓蘭地也以貞觀十九年正月二十四日至京唐書曰戎州晉寧驛八十里至柘東城又八十里至安寧故城又四百八十里至靈南城又八十里至白巖城又七十里至蒙舍城又八十里至龍尾城又十里至太和城又二十

五里至羊苴咩城又西三百里至永昌故城又西渡怒江二百里至諸葛亮城又南二百里至樂城又七百里入驃國境至悉利城又千里經突曼城至驃國又千六百里西度黑山至東天竺迦摩波國又西北六百里渡迦羅都河至奔那伐檀那國又西南四百里至中天竺東境恒河南岸羯朱嗚國又西六百里至摩羯陀國又一路自諸葛城西二百里至騰充城又西百里至彌城又西度山二百里至麗水城又西渡麗水二百里至安西城又西渡彌諾江千里至大

秦婆羅門國又西度大嶺三百里至東天竺北界之  
界箇沒盧國又西南千二百里至中天竺國東北境  
之奔那伐檀那國與前路合又由廣州東南海行二  
百里至屯門山又西行二日至九州石又南二日至  
象石又西南三日至占不勞山又南二日至陵山又  
一日至門毒國又一日至古笮國又半日至奔陀浪  
洲又兩日至單突弄山又五日至海峽又西出峽三  
日至葛葛僧祇國又四日至勝鄒洲又西五日至  
婆霧國又六日至伽藍洲又北四日至師子國是南



天竺之海岸也又北四日至沒來國又西北經十餘  
小國至婆羅門西境又西北二日至拔颯國又十日  
經天竺西境至提颯國又西二十日至提羅盧和國  
又西一日至烏刺國小舟泝弗利刺河至末羅國又  
西北陸行千里至茂門王所都縛達城吳船錄曰宋  
乾德二年詔沙門三百人人天竺求舍利及貝多葉  
書時東京天壽院僧羅業與遣中歸紀西域行程云  
自階州寨西行由雲武西涼甘肅瓜沙等州入伊吾  
高昌焉耆于闐疎勒大石諸國度雪嶺至布路州國

又度大蔥嶺雪山至伽濕彌羅國西登大山有隆瑤  
太子投巖飼虎遂王健陀羅國謂之中印土又西至  
庶流波國及左欄陀羅國有二寺又西過四大國至  
大曲文城南臨涇牟河北背涇河又西二程有寶塔  
城基又西至波羅奈國南臨涇河又西北十許里至  
鹿野苑塔又南行十里渡涇河河南有大浮圖南與  
杖林山相直山北有優波柁多石室西南百里孤山  
名雞足三峯云是迦葉入定處又西北百里有菩提  
寶座城金剛座在其中又東至尼連禪州東岸有石

柱記佛舊事自菩提座東南五里至佛苦行處又西  
三里至三迦葉村及牧牛女池又北五里至迦耶城  
又北十里至迦耶山云佛說寶雲經處又自金剛座  
東北十五里至正覺山又東北三十里至骨磨城謂  
之南印土又東北四十里至王舍城東南五里有降  
醉象塔其北山半曰鷲峯云佛說法華經處城北山  
址有溫泉二十餘井西登山腹有畢波羅窟又東有  
阿難半身舍利塔又北十五里那爛陀寺又東北十  
五里烏顛頭寺又東北十五里伽濕彌羅寺又東十

二里却提希山又東七十里鴿寺西北五十里支那  
西寺西北百里至花氏城育王故都也自此渡河至  
毘邪離城有維摩方丈故迹又至拘支那城及多羅  
聚落越大山數重至泥波羅國又至磨逾里過雪山  
雪里至三耶寺由故道入階州而歸時開寶九年也  
陳鼎滇黔紀遊曰大理府卽天竺之妙香國點蒼山  
卽靈鷲山洱河卽恒水巍峯鷲峯雞足山優波拘多  
石室阿難半身舍利塔畢波羅窟皆大理古迹蓋當  
日由西番轉東行以達大理而南詔爲蒙氏地黔蜀

之路不通也。自古通載釋迦在洱海證如來位靈鷲山說法華經。又釋迦死時迦葉尊者在耆闍窟山後入雞足山。雞足與靈鷲相望而畢波羅窟舍利塔見存。與通紀西陽雜俎吳船錄舊唐書並同。是大理在天竺幅輳之內。爲阿育王故封也。邵戒山元史注曰：天竺阿育王第三子驃苴低奉佛。不如葦日食白飯。是爲白飯王。漢元鼎六年封。其後仁果爲滇王。仁果十五代孫龍佑那。蜀漢封爲白子國王。賜姓張氏。龍佑那十七代孫張樂進求。貞觀十二年因西洱河內。

附封爲建寧國王首領大將軍傳國細農遷改爲蒙  
氏稱南詔大歷十四年改國號大理按此則大理與  
天竺附近故阿育王後得爲滇王矣楊升菴號稱博  
物論南最久所著滇載記雲南山川志未嘗以大理  
爲天竺唐宋天竺屢來朝貢不書南詔又考唐書天  
竺距京師九千六百里距都護治所二千八百里居  
蔥嶺之南幅員三萬里分東西南北中五天竺皆城  
邑數百南天竺瀕海北天竺距雪山東天竺與扶南  
林邑接西天竺與罽賓波斯接中天竺在四天竺之

會都城曰茶鐫和羅城濱迦毗黎河朱史曰自南印  
度九十日至供迦拏又西行一月至海自中印西行  
三程至阿羅尾十二日至未曩羅十二日至博賴野  
迦六十日至迦羅拏俱惹二十日至摩羅尾二十日  
至烏然泥二十日至羅羅四十日至蕪羅茶十一日  
至海自北印度西行十二日至乾陀羅又二十日至  
曩哦羅賀羅十日至闍婆二十日至哦惹曩又西至  
波斯入海凡北印度百二十日至中印度自中印度  
六月至南印度元劉郁西使記曰印度去中國最近

軍民一千二百萬戶佛國有石乞迷者在印度西北  
傳釋迦衣鉢廿一史約編云明永樂中東印度之檣  
葛刺中印度之治納撲兒來朝其道由閩之長樂浮  
海西南行十日占城又七日暹羅滿刺加又五日蕙  
門荅刺又五百餘里檣葛刺西藏志曰後藏十日白  
木戎八日宗里八日小西天二十日卜爾牙踰海半  
日至大西天爲古天竺是皆求諸西海之外失之太  
遠蓋嘗求其故蕃書尊佛之語好大不經沙門紀遊  
之文荒唐其說而後世商賈之至于西蕃也接踵往來



難爲虛謬則不得不求諸海外無稽之鄉以爲道遠則言易証也不知佛迹怪誕出自蕃僧之附會本無實事可指而况城郭邑都隨時更易語言名號信口傳呼既無紀載之文何從考証於數千載以後本屬幻荒之迹何必推尋於數萬里而遙當考前漢書捐毒去長安九千八百六十里後漢書大月氏國去洛陽萬一千七百里而法顯言天竺在于關國西南相隔蔥嶺此天竺之北界也漢張騫傳云大夏去漢萬二千里居西南身毒又居大夏東南數千里有蜀物

此其去蜀不遠矣。此天竺之東界也。漢道通滇國。此天竺之南界也。後漢南夷傳云：從月氏高附國以西南至西海東至罽起國，皆身毒之地。身毒有別城數百，別國數十，雖各小異，俱以身毒爲名。則天竺氏幅員廣濶，去中國本不甚遠。從可知已。今打箭爐以西玉關以南大理以北，後藏以東，在在有經人人奉佛。殆卽天竺之地。前藏謂之衛，殆卽釋迦牟尼之迦維衛國。自後藏更西，別與紅教已屬佛氏之旁門。若必博徵佛迹，非獨法顯元奘之記爲怪誕，卽陳鼎之言

亦爲穿鑿也或曰前藏盟碑具在實係吐蕃不爲天竺若果係天竺之地封錫朝貢信使往來何必取經而遣元裝乎不知元裝隨商人西遊原非遣使而唐時天竺之地已陷入吐蕃因別以印度爲佛國矣漢之天竺不出藏疆也

西藏志曰初祖爲額勒特莽固禮馬克札巴又傳納禮藏布又傳蕪隆藏千布娶唐公主明萬歷間楚布寺僧葛馬巴以紅帽立教業郎寺僧沙馬納以墨帽立教太監楊英賞勅封爲大寶法王 國朝崇德七

年班禪額爾德泥達賴刺麻通貢班禪爲金剛化生  
達賴卽蘓隆藏千布爲觀音化生常在輪廻本心不  
昧故謂之活佛其第十二世班禪第六世達賴順治  
初來朝竊考明史洪武中泥八刺國王馬達納羅摩  
當卽達賴刺麻之始不言化生則化生始自何年何  
至今日而始六世也佛書有云身有生死精神不滅  
此身之前經無量身積而修習則爲佛初未有活佛  
者活佛之說始于前明正德元年命中官劉允往迎  
活佛匿不相見夜奪允寶貨器械以去萬歷中活佛

鎖南堅錯自稱釋迦摩泥自甘州遣書張居正求通  
貢傳有異術能服諸番使大寶法王之屬俯首稱弟  
子云爾元史至元二年徵西僧加刺麻爲灌頂國師  
則刺麻之稱也漢霍去病傳封渾邪神王呼毒泥爲  
下摩侯則胡圖克圖之稱也  
若水又折而東經木裏爲下渡

提綱曰鴉龍江卽古若水源出西番裏塘城西北九  
百里之而巴顏喀喇山東南流曰雜楚必拉東南二  
百餘里有一水自西來會又東南會齊齊爾納河又

南流百里一小水自西山來注之又屈曲東南百餘  
里有馬木七其拉哈納必拉水自北來注之又東流  
八十里有拉木楚池東北流爲囊必池西北流爲噶  
拉木池又東北百餘里入鴉龍江鴉龍江又東有小  
水自北來注之又東南有水自西南來注之又西有  
巴顏禿呼馬達巴孚之水自西北來注之又東南有  
水自南來注之又東南百餘里有水自巴顏禿呼馬  
嶺東山之水自西北來注之又東南至巴顏喀拉巴  
林之南折而南流又東南百餘里有二水自西南合

而來會又東流百餘里爲匝楚七其拉哈納必拉折  
東南至馬木巴顏哈拉之西南有馬木齊齊爾哈納  
河南流百餘里會兩源水又東南流百餘里會彌那  
个出必拉又西南流七十里入鴉龍江鴉龍江稍東  
百五十里有謝楚河源出牟泥茫起山南流三百里  
折西南流百餘里入鴉龍江鴉龍江折西南流四十  
里有鄂宜楚爾古河源出澤塞岡嶺北之大山南流  
又西南二百餘里又東二十里會泥雅克楚河又東  
南三百餘里又東北八十里入鴉龍江鴉龍江又東

南流百六十里有水東北自葛父哥拉嶺來會又西  
南北七十里有水自西北來注之又南八十里至馬  
拉木岡嶺之朱北折而東南百餘里又折而西南七  
十餘里至濟渡處曰八拉馬朱蘓多渾亦曰畢爾麻  
諸速木渡卽喀木諸番人東往打箭爐販茶路也又  
西南百里爲鴉龍江南入占對界有小水自東北來  
注之南經安撫司西而南有三小水自西來注之又  
南有霸泄河自東北來注之又南經刺滾司西有水  
自東來注之又西南折而東南有二水合流自東來



注之又南有二水俱自東北來注之。○按鴉礪江紅  
土百戶四家之地曰唧那工弄曰入哩籠桑曰阿籠  
曰阿拉皆明正司之屬也。以愚經行所見裏塘諸水  
皆入打冲河巴塘諸水皆入金沙江乍了諸水皆會  
察木多迤東之水入麗江而察木多迤西之水皆入  
藏江矣

若水東受甲母水甲母水源出西徼外平地湧出爲門  
基水東北經甲母山爲甲母水又北經雲南永寧府城  
東南受三岔水三岔水有三源東南魯窩海子自干木

山流出北勒汲河自吐蕃流出南羅易江自葭州流出合流注於若

若水又東受瀘沽湖

湖在甲母山之東尾廣二十五里周三百里中有三島

若水又東受雙橋水雙橋水源出涼山堡經鹽源縣城東南受龍潭水又西北受浪蕩水浪蕩水源出雲南浪蕩州東南受麥架河又西北受挖開河又東北受別列河又東北經黑白二井爲鹽井河又北入若

漢書曰定祚縣出鹽步北澤在其南華陽國志曰定祚縣在那西度瀘水賓岡微又白摩沙夷有鹽坑積薪以齊水灌而後焚之成白鹽漢市夷等錮之元和志曰昆明縣有鹽生城中凡取鹽先積柴燒之以水洗土卽成黑鹽

鹽源縣故定祚縣也漢置屬越雋郡齊廢後周置定祚鎮唐武德元年改置昆明縣屬嶺州貞觀二十二年開松外蠻置牢州領松外尋聲林開三縣屬嶺州焉廢永徽二年省三縣入昆明天寶末沒於吐蕃後

屬南詔改香城都郡元初爲落蘭都至元十二年鹽井摩沙會內附十四年置鹽井千戶所十七年分置金州閬鹽州普樂州屬德平路二十七年省普樂州改置柏興府改閬鹽金爲縣屬羅羅蒙慶宜慰司明洪武十五年罷司改屬雲南布政司十七年廢金縣二十四年閬鹽縣改柏興千戶所二十七年改鹽井衛屬四川行都司 國朝雍正六年改鹽源縣屬寧遠府○縣南定笮故城西南昆明故城西北金縣故城別有寧遠落濟古鹽三城皆唐時遺迹漢有遂久

縣屬越巂郡志謂在縣西然章懷後漢書注曰遂久  
故城在靡州界唐書曰靡州屬戎州羈縻南接姚州  
武德七年置西豫州貞觀三年改靡豫領靡豫七部  
二縣夫戎州羈縻則當在屏山以南今雲南之昭通  
府境矣○縣有會鹽營轄安撫司一曰木裏瓜別長  
官司一曰馬辣千戶四日中所左所右所古柏樹百  
戶二日前所後所

若水又東受三渡水

三渡水源出旄牛山西南獫狁境內波浪縱橫舟楫

難渡獫狁於冬春之日用氣皮袋乘人從窩卜水黑  
巖趕到底三處過河自古未用船隻雍正五年勦撫  
獫狁始造船隻過漢土官兵平服兒斯七兒等堡總  
督黃廷桂疏畧曰河西廣袤千餘里七兒堡北有廟  
頂寨則窩卜上渡也堡東凹則黑水巖紫古別中渡  
也堡西意魚克則接輿下渡對江卽木里木克渡口  
也堡南渣姑河乃會鹽瓜別出入總匯兼過河東麻  
哈渡口堡西北磋多逼近後山與明正之烏爾啞相  
連堡西南糯居堡與拉沽木羅相連康熙四十九年

寧番城西土夷狡獪搶掠人民遊擊周玉麟勦討至  
趕到底爲賊蠻羅都伏弩所傷而亡提督岳昇龍撫  
定之雍正五年寧番三渡水黑麻溪腊汝窩諸蠻爲  
亂總督岳鍾琪進勦而黑麻瓦都瓦尾哈哈乞降獨  
三渡迤西之生番不降乃使總兵王側副將王剛破  
中渡之兒斯等七寨而三渡平又近破左所之水寨  
搶獲了馬車而腊女窩平雍正十一年改七兒堡爲  
瀘寧營

若水又東受瓦尾水

瓦尾有土司駐牧其西爲河西有土千總其東爲河  
東有長官司俱安姓世襲以打冲河爲界總督黃廷  
桂疏曰瓦尾據腹心之上虛郎當首尾之衝自瓦尾  
而北爲黑曹山上接窩卜下接水墨巖自瓦尾而南  
爲墨地溝乃枯魯冉與一帶番蠻出入要隘

若水又折而南受左所河又南受得石河又南受淑巖  
河又南受那葛河又南受紅果河

打冲河兩山壁立水勢洶湧狼牙相距舟楫不通有  
索橋橫亘四十二丈自舊瀘州一帶駝運必經此邊



陸之天險也

若水又南經德昌司西

德昌漢蕪示縣也屈部蠻居葛龍城苴部蠻居吾越  
甸獯魯蠻居玕甸獯普蠻領小部三日沙渴普宗日  
烏雞泥宗日媯諾龍菖蒲謂之巴翠部元至元九年  
內附十二年置定昌路軍民府治玕甸又置昌州治  
屈部十三年置德州治吾越甸十五年置威龍州治  
巴翠部二十三年改定昌路爲普濟州而別置德昌  
路于昌州明洪武十五年改德昌府二十五年廢府

改德昌千戶所省德州入之改昌州普濟威龍爲長  
官司 國朝普濟威龍昌州長官司隸建昌左營  
若水又南經會理州西孫水自東注之又南注于瀘  
水經曰若水至犍爲朱提縣爲瀘江按若水入瀘不  
名瀘且亦不經朱提水經悞也

### 孫水

孫水源出冕寧縣西徼外架州窩卜山箐爲瓦那河  
漢書曰臺登縣孫水南流至會無入若水行七百五  
十里水經注曰孫水亦名白沙江源出臺高縣卽臺

登縣南流逕邛都縣司馬相如定西南夷橋孫水卽此水也又南至會無入若水

孫水東南經冕寧縣西北胡琅山

元和志曰臺登縣有長江水本名孫水源出縣西北胡琅山

冕寧縣故都國也帝昌意都於此漢置臺登大笮二縣屬越嶲郡末年省大笮入臺登齊廢於獠周武帝改置白沙郡臺登縣隋廢郡爲登州唐武德九年廢登州以縣屬嶺州又置月邊月亂二羈縻州後沒於

吐番號落蘭部元至元中內附置蕪州于邛都之野  
又置中縣屬建昌路明洪武十五年縣屬永寧州十  
七年縣屬蕪州二十五年州縣俱廢二十七年置寧  
番衛屬四川行都司 國朝雍正六年改冕寧縣屬  
寧遠府○縣屬土千戶一日酥州土百戶十二日架  
州苗曲糯白瓦大鹽井熱卽瓦中村三大技窩卜虛  
卽河西白路阿得橋

孫水又東南受瀘沽水瀘沽水源出越嶲廳南小相嶺  
西南受桐漕河桐漕河源出涼山夷西過太平橋西入

瀘沽瀘沽水又西入孫

順治十八年涼山各番獠據冕山相嶺刦殺桐槽站  
屯堡商旅不行塘汛不通兵備道張元凱討平之

孫水又南經瀘沽峽

峽中山立如壁深數百丈澗不盈尋孫水流其中淙  
淙有聲

孫水又南經松林蠻

松林土千戶王姓世襲隸寧越營○明建昌道鄧貴  
議曰建之松林瀘沽鐵廠鹽之河西越嵩之南關桐

站皆四面陸夷之衝

孫水又南經禮州故城受熱水

禮州治卽漢蕪示縣治也在西昌縣北六十里三國時蕪示邑冬逢叛張嶷討誅之晉廢宋復置唐末陷南詔元至元九年平籠麼城置蕪示千戶所十五年改禮州明初廢○熱水卽元之熱水甸有溫水焉水經注曰邛都縣有溫水冬夏常熱其源可燂雞豚下湯洗沐能治宿疾昔李驥敗李流于溫水是也華陽國志曰溫水水神護之不可污穢及沉亂髮照面則

使人被惡疾元和志曰溫水有二一爲溫水出蘓示  
縣東二十一里平地一爲溫湯水出西瀘縣西十二  
里山下

孫水又南經寧遠府城西爲安寧河受懷遠水懷遠水  
源出縣東北山麓經城南受青柯山之水西入孫

寧遠府古西夷也漢置邛都蘓祁二縣屬越巂郡晉  
大安二年省蘓示以邛都屬寧州咸康二年改爲益  
州宋復置蘓示齊沒于獠謂之越巂獠郡梁開置巂  
州可縣後周天和二年改置巂州宜化郡可泉縣亮

善郡蕙示縣漣沽郡盧古縣隋開皇廢郡爲西寧州  
六年分置越嶲縣十八年改嶺州大業改越嶲郡唐  
武德元年復爲嶺州置都督府領羈糜十六州曰恩  
亮州杜州初漢州孚川州渠川州印盧州祐州計州  
龍施州月亂州浪彌州月邊州團州樞州威川州來  
羌州至德二載沒于吐蕃蒙詔改建昌府以烏白二  
蠻貴之號落至部元憲宗九年內附置建安永寧二  
州隸建昌路軍民府羅羅斯宣慰司至元九年置科  
部絳部落聞部阿多部千戶分建安置寶安州十四



年置大隆城千戶十五年置沙蠻部千戶改熱水甸  
爲瀘州落蘭部爲瀘沽縣十七年改大隆城爲隆州  
十八年置阿都部千戶十九年改絳部爲姜州二十  
二年改中州爲中縣二十六年廢寶安州改阿都部  
爲里州科部爲濶州明洪武十五年罷司改北社爲  
碧社二十五年廢府州縣改建昌衛軍民指揮使司  
二十七年置前衛俱屬四川行都司成化二年置建  
昌兵備道萬歷三年省前衛 國朝康熙八年仍置  
建昌衛雍正六年裁衛置寧遠府西昌縣

漢自滇以北君長以十數邛都最大唐蒙旣通夜郎相如因言邛笮冉駹皆近蜀秦時嘗通爲郡縣漢興而罷天子乃使相如往使畧定西南邛笮冉駹斯榆之君皆請爲內臣除邊關關益斥西至沫若水南至牂牁爲徼通靈關道橋孫水以通邛笮爲置一都尉十餘屬縣元狩元年求身毒道復使間使出西夷及平且闡遂誅邛君以邛都爲越嵩郡邛都縣王莽改爲集嵩郡守枚根調邛人任貴以爲軍候更始二年任貴帥種人攻殺枚根自立爲邛穀王附公孫述建

武十四年貴遣使上三年計投越巂太守十九年貴  
謀叛漢劉尚分兵先據邛都掩貴誅之於是郡復爲  
越巂蜀漢章武三年越巂大帥高定稱王恣睢遣都  
督李承殺之承因殺將軍焦璜破壞郡土丞相遣越  
巂太守龔祿住安上縣遙領之去郡入百餘里不能  
制建興三年安南將軍馬忠率越巂太守張疑領兵  
誘殺蕪朶邑君冬逢及其弟隗渠又斬斯都耆帥李  
承之首而夷人始服初邛都有七部營軍四部斯兒  
守之疑以爲弱不足守乃置赤甲北軍二牙門唐時

勿鄧蠻地方千里有邛部六姓一姓白蠻五姓烏蠻  
又有初爨東欽栗臺雷蠻夢蠻昔祿于勿鄧而勿鄧  
之南別有兩林豐琶二部落今縣有建昌鎮中營轄  
土官宣撫使一曰沙馬長官司正副各一曰阿都右  
營轄長官一曰威龍州左營轄長官司二曰普濟州  
昌州

孫水又南受邛池

漢書曰武帝開邛都縣無幾而地陷爲汗澤因名爲  
邛池水經注曰邛都縣漢武帝開置縣陷爲池因名

邛池南人謂之邛河河中有蚌嶺山華陽國志曰縣  
東南數里有邛廣都河縱橫二十里深百餘丈有魚  
長一二丈頭特大遙望如戴鉢釜狀益州記曰邛都  
縣一老姥家貧孤獨每食輒有小蛇頭上戴角在牀  
間姥憐而飼之後長丈餘令有駿馬蛇吸殺之令因  
大忿恨責姥出蛇姥云在牀下令卽掘地愈深愈大  
而無所見令遷怒殺姥蛇爲姥報仇每夜輒聞風雷  
四十許日百姓相見咸驚語汝頭那忽戴魚是夜方  
四十里與城一時俱陷土人謂爲陷湖唯姥宅無恙

漁人采捕必依止宿風靜水清猶見城郭樓櫓晏然  
今水淺時土人汲水取得舊木堅貞光黑如漆好事  
人以爲枕相贈按蛇卽張亞子亞惡蠻古通故范守  
已謂文昌西漢末寓形邛池

孫水又南受高橋水又南經德昌所受苦馬河又東南  
受落腰河又西南受梁山河又西南受公母河

孫水又西南經迷易司受那阿水

迷易洪武二十五年置千戶所屬會川衛 明朝改  
巡檢司有土千戶一員安姓世襲

孫水又西南入若

孫水亦名西瀘水唐天寶間有西瀘縣在孫水之岸  
東北至嶺州二十七里元爲沙城臉段氏於熱水旬  
立城曰夷籠至元十五年改爲瀘州卽西瀘故治也  
南有武侯城金仁山謂漢永昌故地唐置姚州有西  
瀘縣蓋以馬湖江爲瀘故姚州之瀘爲西瀘○唐貞  
元十年祠部郎中袁滋內給事劉貞諒使南詔白樊  
道縣南七十里至曲州又四百八十里至石門鎮又  
經鄧枕山馬鞍渡二百二十五里至阿傍部落又經

蒙葳山百九十里至阿葳部落又百八十里至渝官  
川又經薄咩川百五十里至界江山下又經荆溪谷  
三百二十里至湯麻頓又二百五十里至諾東城又  
經安寧芥三百九十里至曲水又經石鼓二百二十  
里渡石門至佉龍驛又六十里至雲南城又八十里  
至白巖城又八十里至龍尾城又四十里至芋苴咩  
城貞元十四年內侍劉希昂使南詔自清溪關南經  
大定城百一十里至達仕城西南經箐口百二十里  
至永安城當滇筰要衝又南經水口西南度木瓜嶺



二百二十里至臺登城又九十里至蕪示縣又南八  
十里至樹州又經沙野二百六十里至羌浪驛又經  
陽蓬嶺百餘里至俄準添館陽蓬嶺之北嵩州境其  
南南詔境也又經箐口會川四百三十里至河子鎮  
城又三十里渡瀘水又經襄州徽州五百四十里至  
姚州又南九十里至外沱蕩館又百里至佉龍驛與  
戎州往芋苴咩城路合按唐通南詔之道一由蹊道  
一由清溪錄之爲好古者遊迹所至試參訪焉